



## UNTUK SIARAN SEGERA

### KENYATAAN MEDIA

#### **TIADA LESEN MENANGKAP IKAN KEPADA WARGA ASING DAN DOF KOMITED BANTERAS PENCEROBOHAN KAWASAN PENANGKAPAN IKAN**

1. Jabatan Perikanan Malaysia (DOF) memandang serius berhubung laporan pihak media mengenai **pencerobohan vesel nelayan Vietnam** ke dalam perairan negara yang mengakibatkan ketirisan hasil laut dan **pencerobohan kawasan oleh vesel pukut tunda tempatan**.
2. Ingin ditekankan bahawa, **DOF tidak pernah** mengeluarkan lesen laut dalam untuk diberikan/disewa/dipajak kepada warga asing dan lesen yang dikeluarkan oleh DOF adalah kepada individu atau syarikat tempatan sepenuhnya.
3. Sebanyak **341 kes tangkapan vesel asing** dengan nilai rampasan dianggarkan sebanyak RM682 juta telah dilaksanakan oleh penguatkuasa DOF, APMM dan Polis Marin pada **tahun 2017 hingga kini**.
4. Dari jumlah tersebut, sebanyak **285 kes tangkapan vesel Vietnam** telah dilaksanakan, manakala 44 kes melibatkan vesel Indonesia, 6 vesel Thailand dan 6 vesel dari negara lain seperti China, Taiwan, Singapura dan Filipina
5. Manakala sebanyak **786 kes vesel pukut tunda tempatan** telah menceroboh kawasan pantai dengan nilai kompaun, denda dan lelong ikan berjumlah RM2.02 juta yang telah menimbulkan konflik kepada nelayan pantai.

6. Mulai September 2017, **DOF tidak lagi** mengeluarkan permit laut dalam untuk vesel perolehan dari luar negara. Terkini, DOF menggalakkan pembinaan vesel baharu dalam negara melalui pemodenan vesel.
7. Tindakan tegas yang telah diambil adalah dengan melaksanakan **program pemutihan vesel laut dalam** bagi memastikan lesen diberikan kepada pengusaha yang benar-benar tulus dan mematuhi undang-undang serta prosedur pelesenan yang ditetapkan. Akta Perikanan 1985 juga telah dikemaskini bagi memastikan setiap kes dapat disabitkan kesalahan.
8. Sejak tahun 2011, sebanyak **577 vesel laut dalam telah dibatalkan lesen** dan 61 lesen lagi sedang di dalam proses pembatalan, termasuk pembatalan permit yang tidak memenuhi syarat pelesenan.
9. Bagi mencari jalan penyelesaian kepada kemelut **pencerobohan vesel pukat tunda ke perairan pantai**, DOF melaksanakan transformasi pukat tunda melalui program *exit policy* bagi memastikan kemampanan sumber perikanan.
10. Nelayan digalakkan untuk **mengusahakan vesel Pukat Tunda di Zon C** atau menukar peralatan yang lebih mesra sumber sekiranya hendak kekal di zon yang sama.
11. Sistem pembaharuan lesen akan ditambahbaik dengan penggunaan **Report Card** bagi vesel laut dalam bagi memberi wajar serta penalti ke atas prestasi pendaratan ikan, keaktifan alat MTU-VMS, ciri keaslian vesel dan juga bilangan kesalahan yang dilakukan.
12. DOF turut akan melaksanakan penggunaan **Quick Response Code - QR** dan **Radio Frequency Identification - RFID** ke atas vesel laut dalam sebagai kaedah identifikasi dan pemantauan. Selain pemasangan alat **Automatic Identification System (AIS)**, DOF akan melaksanakan penggunaan sistem **e-logbook** bagi hasil tangkapan ikan.

13. Kerjasama serantau untuk membanteras penangkapan ikan secara haram (RPOA-IUU) juga diperkukuhkan melalui platform *bilateral* dengan negara Vietnam dan Thailand.
14. DOF juga komited melaksanakan **operasi bersepadu** bersama agensi penguatkuasaan melibatkan Agensi Penguatkuasaan Maritim Malaysia (APMM) dan Pasukan Polis Marin (PPM) bagi membenteras pencerobohan vesel asing dan vesel tempatan di perairan Malaysia.

**####**

**DATO' HAJI MUNIR MOHD NAWI**

Ketua Pengarah Perikanan Malaysia

Wisma Tani, Putrajaya

7 Mei 2019 (Selasa) jam 3:00 petang

---

Sebarang pertanyaan sila hubungi:-

No. Tel : 012-356 9344 (Yazeereen)

013-631 7313 (Sharir)

Email : ukk@dof.gov.my : pro@dof.gov.my